

A Monthly Christian Magazine


AN ORGAN OF THE ZOU PRESBYTERIAN CHURCH SYNOD

Khristian Tangkou

ဃုဝကၢလတၢဝဃ တိဝဃဃုယုခၣ်

Vol. 61 || No. 4

April, 2025



Editor: Rev. Dr. Hangpi Manlun

Synod Kumpuon

Khrist Jesu a um Lungsim

[Phil. 2:5]

Khristian Tangkou

Vol. No. 61 || Issue No. 4 || April, 2025

Editorial Board

Editor : Rev. Dr. Hangpi Manlun - 9862910875
Joint Editor : Rev. Zamlianpau - 7629978067
Cir. Manager : Upa Jamsianmung - 9862086615
Bus. Manager : Nu Niangkhanmang - 9863934719
Nh. Suanneiching - 8787790520
Nh. T. Naomi Goulianching - 8413854088
S. Joel Lianmang Zou - 8729906706

Cont. Editors : Rev. Awnkhankhup - 9383114081
Rev. Khupsianlal - 8974749874
Rev. Lamsuanthang - 7005723755
Upa Khaiminlian - 9612479417
Upa Khupsuankham - 9863193371
Dr. S. Thangboi Zou - 9862754101
Upa Thangzasuan

ZOU SYNOD ULIENTE

- **Moderator:**
Rev. Kaimuanlal
- **Moderator Elect:**
Rev. Khamminlian
- **Secretary (Sr):**
Upa Kapkhanhau
- **Secretary (Jr):**
Upa Khaiminlian
- **Treasurer:**
Upa Thangchinpau
- **Statistician:**
Upa Dongzapau
- **Executive Secretaries:**
Rev. Dr. Hangpi Manlun
Rev. Zamlianpau

Copies - 1000

AMAN

Kumkhat ah	- Rs.	100
Post ah	- Rs.	200
Copy khat ah	- Rs.	10
Life Member Fee	- Rs.	1,000
Patron Member Fee	- Rs.	2,000
Memorial gift	- Rs.	2,000

A sung thu

- Editorial..... 01
- Thu tuomtuom & Thumpi ding 04
- Kross tung a Jesu thugen sagite.... 08
- Zin bawl dan siem 11
- Kei leh ka Innkuonpiten..... 13
- Jesu tuipi tung a keng a a peina.... 15
- Khrist Jesu a um lungsim 16
- Eatser Sunday Message 20
- ZPWF Column 22
- ZPYF Column..... 24

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



SISAN TOH TAT KHIEHNA THU

(Good Friday Sermon)

“Sisan suolouin suol ngaidamna a umsih ding” a chi zieh in ahi.
(Henbrute 9:22).”

Thupatna.

Tatna (Atonement) chi umzie khu ‘khatvei sep zou sieng china’ ahi. Mini kilemlou kilemsah ding leh pumkhat a siem china ahi. Tuaban ah Tatkhiehna I chi chiengun silthum a um a: i) Vatat khiehpen, ii) Atankhie pa leh iii) atatkhihna pa chite ahi. Tuachin atankhiepa in aman pie in, atatpa/nu khu ang suotata in asuoh hina kipat in ang zalenta hi. Thamlouin aneitu jong ang kikhehta a, mi tha in ang neita hi.

Tualeh Greek ham ah tatkhiehna chi kammal chithum in akigen kia hi:

- i). EXAGORAZO: Tam pen bazaar a sum metbawlina ding a zuoh son ding a lei a man pieh china ahi
- ii). AGORAZO: Tampen bazaar pan a van lei bang a lei; akilei zou chieng a aleipa sila/suoh a annasem china dan ahi.
- iii). LUTROO: Tampen ahikia leh phelkhia, suohtasah china ahi. Atankhiepa in sum apieh jieha hing suohta ahita hi. Ahin, atankhiepa in force a nna semsah somlouin, atakhieh mipa/minu pen in asepnop leh sepnop lou ama sie-le-pha theina tung ah akinga china hi.

Tuaban ah ‘tan’ ichi uh umdan kia khat ahileh

- i) Mi khat in abong khat mi lou ah/huon sung alut ta leh atatkhihna thu ahi. Aman ahuon neipa lungkimna bang in sum in avatan hi. Tuajou chiengin

bawngpen apu a ang suoh kiatheta a, tuachin lou neipan thuneina anei non sih hi.

ii) Tualeh Hebraiten ata uh pieng masa penpente uh Pasian a angai jiehi un ana pekhie uhi. Tualeh adei uh leh sum bangza ahiai khat toh anua lei kia jeljel uhi.

iii) Tualeh mi a genthei jiehi a mi suoh leh sal a um khu a innkuonpiten/ akinaipiten avatat dohna thu uh jong ahi.

iv) Tualeh Hebraite ading in Aigupta leh Babylon apat tatna khu TATNA LAHLAH a THUPIPENTE ahi uhi.

v) Tuaban ah Greekten jong suoh khu ama-le-ama kitankhiethei bang in agen uhi. Suohin sum akhol a, tuachin Temple ah Siempu in apu kung ah asumte apie a, tuachin suoh khu ang suohtata hi. Tamte thei kom in hundamna khu “Tatna” chiin jong akigen hi.

Ei mihingte tat ikulna jiehte uh:

1. Suol/khelna in khawvel pumpi asuhsiet jiehi in I Lengte 8:4-6, ‘Koima silbawl khielou a um sih hi. ii) Sam 14:3 ‘Koima silhoi bol himhim a um sih hi a chi hi.

2. Suol in Pasian toh ang kikhensahta jiehi in. Pasianin suol ahua a, amunuom sih hi. Tualeh Suol khun Pasian to hang khenta hi. ISai 59:2 “ I suolnate un ei leh Pasian ang kikhensah hi” (Mak 3:39; Ephesa 2:1-4; Sam 58:3).

3. Mihingte ama-le-ama in akihundamthei sih hi. Tuamaiban ah Khrist tatkhiehna in tamte lah akipat in ang hundam hi.

i) Dan hamsie lah akipat in (Galatia 3:13) ii) Dan vaihomna nuoi apat in (Romte 6:14; Galatia 4:5). iii). Suol silbawltheina leh akipat in (Tita 2:14 leh Romte 6:4). iv). Setan silbawltheina lah akipat in (I Cor. 2:14). v). Khrist in amite khu amanpie in ang tat khie hi. (I Kor. 6:20).

Tualeh Thuhun lui a tatna vanzah khu “Belamnou” ahi. Adam leh Eviten khelna/suol ang bawl cheing un guohtang in ang um ua, azumhuaina uh khuna/tuomna ding in theipite akhui uhi. Ahin tamten atuom theisih ua jong Pasian in jong apomsah sih hi. Tuachin Pasian in belamnou ni athat a, avunte uh toh atuomta hi. Amauhte suolna jiehin suolna neilou belamni ashita hi. Ajiehpén Baibulin, “Sisan suolouin suol ngaidamna aum sih ding” achi jiehin ahi. (Henbrute 9:22).

Thamlouin, Thuhunlui a silpieh pema sapente tung ah jong akilang chieng mama hi. Kaina in alou a haichi piengte Pasian apie a, ahin Pasian in

apomsah sih hi. A jieh ahileh sisan apanlou jieh ahi akichi hi. Tualeh Abelin agata thau leh hoi pente apieh jiehin pomsah in aum hi. Bangjeh adieile? Kaina sang a Bel agamtat hoijoh jieh ahisih a, ajieh pen ani un misuol tuohtuoh ahi uhi. Pasian in Abel apomjeh ahileh aman belamnou alat jieh ahi hi. Tuakhu belamnou Jesu etsahna ahiban ah sisan atel jieh ahi. Ginna in Abel in Pasian tapa hing peiding lim-le-mel an aching masa chi jong imu thei uhi.

Tuaban ah, tamna silpieh nite’n a etsah khu lampi khat beh aum Pasian toh kinaina ding in china jong aensah hi. “Hinna nei jousie hinna khu sisan ah aum hi” Tuajiehin, “Sisan zousie khu mipite tawnkhelna lah mangna ding in maitam tung a buoh ahiding hi, chiin Mangpan thu apie hi” (Levitikas 17:11).

Tuaban ah Isralete Aigupta Pharo nuai a kum 400- sung vingveng suoh a umlai un, suohtatna ding in belam sisan jieh ahikia hi. Tuachin Pharo in Israelte apotsah utlou jieh in Pasian in Gotna chi (10) atungsah hi. Atopna khu tapa upapen leh ganta upapen shina tungton in agawot hi. Tuana suohtatna ding in Pasian in lampi khat abawlsah a, tuakhu Innkuon chinten belamnou gensiet bei khu atha chiet ding uh ahi. Tualeh abelam tha ding uh ahileh ahoibukim, dembei, mel hemlou, leh ateh jong ahilou ding ahi. Tualeh nili akoi ding ua, tua jou chieng in athatpan ding uhi. Tuachin belam sisan khu akotkhah mai uah atat dingua tuachin sisan kitatna inn zousiete khu Angel in apeikan jeljel ding hi. Tammi thuin eiten Khross a Jesu sisan Tungton a damna itanding dan uh ana malepta uhi. Tuachin tam belamnou sisan in shina apatin a HUNDAMTA uh hi. “Sisan ka mu chiengin kang peikan ding hi” achi hi. (Exodus 12:13).Tualeh sisan kitatlouna inn sung jousie atapa upapen in shina atuohtha uhi. Ahin belamnou sian kitatna inn zousieten suohtatna atang uhi.

Tuabang in eite belamnou Jesu jong kum 30 vel ahilaitah in ang shiat hi. Ajieh ahileh Pasian belamnou eite khelna tang a shipa ahijiehin ahi. Eite khelna ding in Jesu Moria/Kalvary tang ah asisan manpha toh ang tanta hi. Tuami sisan nuai aumten hinna anei jel uhi. Judaten belamnou tahsa aneh bang un, eiten jong Jesu sisan leh tahsa ama ithei gigena ding in ila un ine un idon ding uhi.

.....

Aziehpen Pasian in khovel a it sengsenga,
tuachi’n a tapa tangkhat neisun apie hi,
koipou Ama gingta in amanthat lou a
kumtawn hinna anei zawhna dingin.

Thy tuomtuom leh Thumpi dingte



1. Pasion lungsietna leh mapuina toh April 2025 ha i tung kiata ua, Khristian te a ding a Kut poimaw mama Palm Sunday, Good Friday leh Easter Sunday manpha tah a zang thei ding in Pasion kung ah kilan tha chiet va ui. Tualeh Pentecost/PCI Assembly Day of Prayer zong zang tou thei ding in Pasion mapuina ngen va ui.
2. Tribal zousie kipumkhat a, tup kibang a, a tawp tanpha tuibang i luonkhawm ua Saperate Administration i mu theina ding un theitawp suo in thum va ui.
5. I gam buoina toh kisai a Lamkai tuomtuomten kituoh tah a vai a hawmkhawm theina dingun thumpi chiet va ui.
6. India gam sung mun tuomtuom a Khristian te soisahna gen ding um zel ahina ah, Pasion venbitna zal a i Pasion uh i bieh ding dan tah ua i bieh thei ua, Manggam i kehlet theina dingun thum zom zel va ui.
7. I gamsung abuoinate a hing ven a, hindan ngaina i zah thei kiana dingun bangkim bawltu Pasion kung ah chitahtah in thum chiet vai.
8. Pasion mapuina toh North Tripura a Mission Field ah School leh Quarter lamna nasep pat ahita a, nasemte Missionary Tongminmuan lamkaina toh nasemte toh thanuom thei mama in lamzang tah in sem ua, mu thei in ma sawn mama uhi. A hing zaw sieng theina ding un i thumna toh delzui chiet va ui.
9. Tu kum 2025 Synod kumpuon ding **“Khrist Jesu a um lungsim”** (Philippi 2:5) chi ahi dungzui in i lungsim khu Khrist Jesu a um sah in ama kipuisah sawm chiet ding in simtute zousie Pasion min in i kichiel uhi.

NA SUM LEH NA LAMSATE IN MANGPA PAHTAWI IN

By:- Upa Khupsuankham
Cont. Editor

“Mangpa hoina khu bang chiin ka thuh thei ta diei?” (Late 116:12)

Bible mun tamtahte ah sum leh pai a nasepnate imu uhi. Mangpa Jesu ngel in hou, sum tungtang ahagen mama a, i sum zahdante, i sum kepdante thu ah leh i mopuohdante ang hil hi. Pentecost zou a Hattuum ang kiphukhiet akipat in Sawлтаhte nasepna a sum apoimawdan leh manna dihlou a imandante imu ua, tuaziehin Hattuum a Pasian thugen leh sum leh pai lam saite khu Sawлтаhte leh Upate’n nasepna khu a siemtang ngal uhi. Sum ichi pen Khantanhoi puonzahna leh ki-etkolna in Pasian in amang zel chi imuthei uhi.

Setan in zong sum leh pai mang in nna asemta a, sum tampi a zang hi. Abang hitaleh zong i tahlat ut pen khu koi in zong Mangpa Jesu, a Mang leh a hundampa a apom tahtah leh, alungsimte, asilnei, asum mandante achil a, aumdan sangin ang kilamdang zawta hi. Mangpa Jesu gingtute khu’n sil peidan tangpите khu amuchien ut leng ua, aziehpен mihing lungsim, mani kilungsietnate kideikhopna aum zel thei zieh ahi.

Pasian khu apetu ahi: Pasian a dingin sil kapie a, ka bawl ichite khu ingaituo chiengin azum huoi leng hi. Aman ang pieh ziehin ihing ua, ikhosa uhi (Nas. 17:18) chiin ang nahil hi. Aziehpен sil leh bangkim nangma a hing kipan ahizaw a, nangman nang piehte bou kang nuopiehkia uh ahibou hi. Gen. 1:29-30 ah Pasian in mihingte leh tungleng Vasate ann dingin loupa leh singkung naa

neite ka siemta hi chi imu uhi. Dangka leh dangkatah leh suongmantam leh sie leh daaite khu tuisung leh leivui ah ang koisah hi. Huikhuo hoi leh nisavah, um leh votte leh bangkim ang pie hi.

I Hagau damna dingin “Jesu” ang pie a, Hagau siengthou zong ang pe nalai hi. Tambang guoljawlna donsenglou sil ang piehte ziehin eite’n ka tunga, asilpha bawl zousie ziehin Mangpa khu bang e ka pieh thuh ding ichilou thei sih uhi. Silpieh sum leh pai

ichite khu gingtute a dingin Pasian hoina phat a nuomthu genna kithoina ichi leng te uh ahi.

Silpieh hamsa isahna zieh uh khenkhatte: Jesu hunlai in Phaisaite’n sawm-a-khat feltah leh dihtah in apie ua, hinanleh Mangpa Jesu’n adem a, pe nanlei Pharisaita bangin Pasian in hing dem giep khava chi i zau zieh uh ahi. Ka sum leh pai lamkhiette khu keima lamsa, ka khut ngei a kasep leh kabawl a ka lamkhiet ahi ichi

ziehun i pieh ding khu i itt kenkon uhi. Thuhuntha ah sawm-a-khat leh silpieh dangdang pieh kiphamaw nonlou a ingai zieh uh. Sil ipieh chiengin Pasian kunga pelou a koite kung ahiei khat kunga pie a ikingai ziehin hamsa isa uhi.

Tampi pieh ding lah kaneisih a, tawmtham pieh ding lah gimhuoi kasa a chiin i pesih uhi. Silpieh ding khu ahun, ahai a pieh ding, hun leh isum nei hun lemtang akituoh thei sih a ka pesih hi ichi uhi. Innkuuon kithukimlou ziehin zong ipesih uhi. Sawm-a-khat peta leng ka innsung van leina ding kichinglou ding, ka pocket money ding umlou ding ahi ziehin ka pesih hi ichi uhi. Unau, Thuhuntha ah Sawm-a-khat pieh ding kigenkhasih ichi leng ua, Rom 12:1-2 i-et leh na pumpi a kilaan dingin kang phut a, tuakhu na bawl lawmmawng uh achi hi.

Silpieh khu chibai buhna: Ei Presbyterian Hattuum te'n, "*Pasian chibai buh*" ichi chiengin Thunget, Thugen, Kisingsahna, Lasah leh Silpiehte ingaina ua, phatna laa te sa in i Pasian iphat ua, chibai ibuh uhi. Thuhunlui lai in michin in Pasian a phatthei sih ua, tu in vang i Mangpa Jesu Khrist zal in michin, namchin in i Pasian uh i phat theita ua, tualeh Pasian ibiehna uah silpieh khu sil poimaw khat ahita hi. Pasian kung a silpieh khu mi tampite'n i ngaituo detdet sih ua, Pasian nasepna

poimawna zieh a mailam nawt zelna dia pie zong i um uhi. Min peta chi man a pieh zong aumthei a, ahoithou a hinanleh eima tup bang zel a pieh ngeingei ding ahi.

Pasian itsem na ahi: "Agingta poumate" chi leh "Ahepi tapoute" chi khu thunun khat ahi. Pasian in ang lungsiet zieh a ipieh uh ahi. Ei gingtute dinga itna thupizaw khu "Agape" ahia, tuakhu itna sangpen ahi. I Mangpa hing itna letsemna khu i thuhna, i hepina kilahna pen khat silpieh ahi. Mi'n a itte a dingin bangma it aneisih a, Pa leh ta, nu leh tate, nungah leh tangvalte kilungsiettuo theina khu a sil nei itpen uh itlou in a pephal ngam leng uhi. Tuamabang in Pasian in atapa ang piehbangin eite'n zong i itt pen uh i lungsim pevai. Khovel a sum leh pai sanga thupizaw um tamananleh Mangpa kunga i lutpi ngam ding uh ahi.

Sawltah Paul in Korinth mite kungah, Silpieh khu haichitu leh aga aat toh kibang achi hi. Agaloute khu haichi tulou, aga aat ding zong neiloute bangin agen a, tulai eite zong tuachi bang ihi uhi. It kawmkawm a pelou in piehlou theilou banga ngailou in pie uhen. Mite maipha sui a ipieh ziehin Pasian mit i tungah tung zoulou hi. Pasian in kiphaltah a petute khu akipahpi a, aguoljawl zel hi (Thupil 22:9).

Pie un, tuachin pieh in um

va uteh (Luk 6:38). Hindute thupil khat in, khut langkhat in buchi athe a, khut langni in aga a aat hi achi hi. Ipi uh, “Meithainu” tholawm piehdan, Biehinn a akikhopna uoh akhe chiet ua, tholawm khiehna bawm nuasang anualang ah Jesu atou a, mite tholawm khiehndan nana en a, atawpna ah, “Meithainu” hing pei in a niih mong sakhou a, a zing ann ding, anitah ann dinga avom vevaw paisa san khat akhie hi. Jesun amu in anuazuite akhutzap a, akung uah, kahing hil ahi tholawm bawm a tholawm khete lah ah meithainu’n akhetampen a, “Van athawn” achi hi. Amos in Israel mipite kungah na thumanlou zieh un na khawpita ua Kiel ka tungsah a, hinanleh ka kungah nang kile ut vawt sih uh, Mangpan achi hi. Na annkung un guotui angai laitah in guo ka zusah sih a, na annkungte uh mutgaw dingin khalhui lum pempom ka langsah a, khaukhupte’n lah Olive singkungte zousie a netum sieng ua, a nehmauwte uh a kausan gawp sieng a hinanleh nang kile ut tuomsih uh, Mangpa’n achi hi.

Egypt ka gawtna bangin nalah ua, pul natna kaha zouta a, na tangvalte uh galsatna mun ah tha in a um ua, na sakolte uh zong aki kaimang siengta a, na giehbuh zousie ulah mishi ui a pumdimta a, na nahkuo dimdim in kang namsah a, hinanleh nang kinuohei ut sih uhi. Mangpa’n

achi hi. Ngai un, na tung uah tambang bawl ding kahi ziehin kiging unlen, “*Na Pasian tuoh dingin mans’n um in*” (Amos 5:12).

Nupa kilungtuoh Anania leh Saphira (Nas. 5:1-5): Anupa ua akithukim bangun agam leitang akimkhat zuoh uh ang kichi a, ngai in na zuoh masang un zong nang a ahia, na zuoh zou un zong nou a ahinalai hi. Anupa un Sawltahte a sol ua, Pasian sol nahisih ua, Hagau siengthou sol nahi uhi. Agam kimkhat man imm dingin akithukim uhi. Peter in Anania thu a dong a, na gam kimkhat uh na ip tahtah uh ih? Ing chi hi. Saphira adingkhie a, akidohnate dawng manlou khop in adin shita hi. Ananiate nupa in Sawltahte kengbul ah ka kitahsap ziehun ka gamman uh 50% pen ka ip ua, ei ngaidam in chi thuphatawi uleh kingaidam khamawlou ding hia maw! na nupa un mihing sol nahisih ua, Pasian sol zong nahisih ua, Hagau siengthou sol nahi uhi.

Eite’n zong i mimal, i innkuon leh i nupa a Hagau Siengthou sol dingin kipei sih vai in, Pasian in ang piehte apat i pieh uh ahibou a, atunna ding tunglou a pheivat chite, Ananiate nupa tungtang mukawm in kingaisut pha vai e!. Mangpa zatat inlen, na gamsung a GA hoipen Ama pie in” (Thupilte 3:9). Mangpa’n athu guoljawlta hen, Amen!

KROSS TUNG A JESU THUGEN SAGITE

(Good Friday Message)

Rev. Dr. Hangpi Manlun

Thupatna:

Khawvel a mi tampiten a shikuon chiengun a hinkhuo peisate uh a nua gel jeljel uhi. Tuabang a innkuonte uh leh a lawmte kung uah vaihahna thute a gen jeljel uhi. Tuachi mabangin, Jesu khu tahsa hing pieng in, za a za (100%)- Pasion hina leh mihing hina hing nei in tam khovel ah a hingpei a, tualeh a shi kuan dingin Ama'n Khross tung ah thumal/kamteng sagi a gen hi. Tamte khu "Khross tung a Jesu thugen/kamteng Sagite" a kichi hi. Tuate isuiding uhi.

1). Pa, Amaute Ngaidam in a silbawl uh atheilou jieh uh ahi (Luk 23: 34).

Mangpa Jesu khu mikhielte a ding a hundamna lampi a bawlsah thei na ding in, khross ah kilbehin a hing um hi. Khross kung/gei a mipite leh sepaite'n chiammuibawlnan nei ua, zu thua a pia ua, tualeh a kung ah hichiin a chi uhi, "Judate Kumpipa Na hi leh, nang-le-nang kihundam in!" (Luk 23:37). Banah a kung a migilou kikkaite khat na ngawn in zong a housie a, hichiin a chi hi, "Khrist hi lou na hiei mah? Nang-le-Nang kihundam inlen kou zong hing hundam in!" (Luk 23:39). Mangpa Jesu'n amaute ading in a thumsah hi. Jesu'n Pasion kung ah a khelna/suol uh ngaidamna ding a kikiilbeh ahi chi thei lou mite a dingin hepina leh ngaidamna a ngetsah hi. Amaute'n a silbawl uh khelna/suol ahi chih zong theilou ahi maithei uhi.

A lungsietna bangchilawm lawm a thuh leh thupi ahitai? Jesu khu Pasion bangkimbawltthei toh pumkhat ahi ua a ut leh jong Khross apat in bailamtaha hing kum in A suohta thei hi. Hinanleh, jong Pasion deina bangin hundamna dinga kiguot a suhbuchin theina dingin kilbehin a um hi. Tuajiehin, Ama'n bawlgentheina

leh zumna chinteng a thuoh zou in, lungsietna lientah toh a thumpi a tualeh ngaidamna ngetsah zosop hi. Tamtah ah, "Amaute" kichi in Ama kilbehtute leh chiemmuibawltute bou/chau a kawh sih hi, mi koi zong Jesu Khrist pom lou zousie leh miel nuai a leng/tengte zong a kawh hi. Tualeh Jesu'n Khross a kamteng masapen tungtawn in Pasion deidan/ zawn bang ahiei chi leh Khristian lungtang pua dingdan ahing hil hi. Matthiu 5:44 ah, hichiin a chi hi, "Hinanleh zong ka hing hil ahi, na melmate lungsiet inlen tualeh nang hing sugentheite a dingin thum in." Tuajiehin ei hing sugentheitute zousie a dinga i thum thei ding uh ahi.

2). Tuni in Kei toh Paradis ah na umta ding Hi (Luk 23:34).

Jesu khu Golgotha, "Lugu mun" a khaikang ahilain migilou ni zong Ama toh kilbeh ahi uhi (Luk 23:33). Migiloute laha khatpen in A kung ah simmotahin a hou hi. Hinanleh zong a khat pen pa'n migilou masapen a phawh/tai a, ama a khelnate a kisia a, tualeh Jesu a Hundampa in a pom hi. Tuachiin Jesu'n Paradise ah Ama toh a umkhawm ding chithu a chiem hi. Paradise khu Abraham

angsong ahichin Jesun a gen hi. Tualeh Thuhunlui hun lai a misiengthou sisate hagau uh umna mun ban ah Paulin van thumna umbang in jong a gen hi. (Ephesa 4:8-10). Jesu'n Amakhu Messiah misuolte a kisia chieng ua ngaidam thei leh Khross a, A kamteng nina tungtawn a hundamtu ahidan a puongdoh hi.

3). Numei, Tamnah Na Tapa: Tamnah Na Nu.

Tuaziehin Jesu'n a nu leh, nuajuite a itpa a kunga ding a mu tah in, a nu kung ah, "Numei, en in na tapa!" a chi hi. Tuachin, nuazuipa kung ah, "En in na nu!" achi hi. Bible i et chiengin, Jesu'n "Nu" a chi sih hi. Etsahna dingin, Johan 2:1-11 sung ah, Jesu'n a nnasepna apat nua a tui uoi-in a suohsah a sillamdang masapen a bawl hi. Tam sillamdang khu Galilee a Kana khuo a kitenna a siltung ahi. Jesu-le-a nuajuite zong chiel in a um uhi. uoi-in ahing bei tahchiengin, amari in a kung ah, "Uoi-in a nei nawn sih uh," a chi hi, ajiehkhu ama'n Pasian Tapa ahi a, Jesun tui uoi-in a suohsah thei hi, chi a thei hi. Jesu a kungah hichiin a chi hi, "Numei, nang hing theisah ding bang a um ei? ka hun atung nai sih hi" (tang. 4).

Jesu Ama-le-Ama kipuong in Khross a mihingte hutdamna ding Pasian silguot subuching in i Hundampa dinga khovel a hingpei ahi chi a gen hi. Tuajiehin Mari khu "Nu" chi lou in "numei" a chi hi.

4). Eloi, Eloi, Lama Sabachthani (Mark 15:34).

Tam khu Aramaic ham ahi a, thuhamsa mama ahi. Azieh ahileh

"Pasian in Jesu taisan/peisan ngai ei?" chi ahi. Gnostic pawlin Jesu khu baptistma atan lain, Ama ah Pasian hina ang um a, ahin khenbeh a aumtahn a Pasian hina in apeisan/ taisan bang in a gen uhi. Ahina Jesu khu bangchitan dongin Pasian in ataisan ngaisih hi.

Jesu khu Khross ah jinglam dah kua vel (9:am)- in kilbeh in a um a, tualeh dahkal thum nua in, sun tang laitahin, leitung pumpi ahing miel a nitaahlam dah thum tandong china ahi. Naikal guh zou in, Jesu'n Pasian a han hi, "Eloi, Eloi, lama Sabachthani" Jesu khu A gim mama hi, ajiehkhu Amakhu gamdai nisa khautah nuai ah A sisan leh tui luong in Khross tung ah naikal guh sung A kikhai hi. Amakhu hagim in A gim hi. Ahisihleh bang dinga, kikou ahiei? Ama leitung a a hingpeina jie ahileh dawimangpa nnasepte suse ding leh eite a dinga hundamna kot hing honsah ding in ahi.

Pasian in A Tapa khawvel khelnate a puoh ziehin en ngamlou in aumban ah, Mangpa Jesun jong thawmhauna nasatah tami hun in atuoh hi. Tuachin thawmhautah in,. "Ka Pasian, Ka Pasian, bang dinga hing taisan Na hiei? chiihan ahan hi..

5). Ka Dang a Tah.

Tamnah Samaria gam a tuikul bul a dawnding tui anget bangin tamnah dawn ding tui angen hi. Thuhun Lui ah, Jesu Khross a A thuoh ding toh kisai genlawhna tampi a um hi. Late 69:21 ah, hichiin a gen hi, "Ka ann dingin sitheina gu ahing pie ua, ka dangtaah chieng in kadawn dingin,

zupawng thuapi ahing pie uhi.” Late a kigenlawh bangin, Jesu’n, “Ka dang a taah,” a chi a, mite’n spangi zu thua/pawngpi a die ua, spangi khu hussop chiengkang dawn ah atah ua akam toh sutuo tou uhi. Bethlehem khuo a Jesu Khrist a pien masang hun sawtpi in, Late gieltu in Jesu Khross a kilbeh leh A shidingdan ana mulawh a ana giel hi. Jesu’n, “Ka dang a taah” A chi a tuachia Pasian Laibu khu ahing tangtun theina ding in.

5).Ka dang a taah

Hagaulam umzie toh kisai i ngaitua ding uhi. Mi tampite’n gilkielna a thuaah zou ua hinanleh zong dang taahna a thuoh zou sih uhi. Jesu khu gimse dimdem hi ajiehkhu Khross ah dahkal guh sung kilbeh ahi a tualeh gamdai a ni sa mama nuai ah A sisan a luongsieng hi. Tamkhu Jesu’n, “Ka dang a taah,” a chi in tahsalam dangtaahna sangin hagaulam dangtahna ana sazaw hi. Jesu’n tua hagau mangthangte hundam A utdan hing lahna dingin A dangtahdan ahing hil hi. Tuajiehin, Jesu sisan hingluonna tung a na kipaah ding ahi a, tualeh mite hundamna lampi a pui tuin a dangtah sudai in.

6). Zo Ahita:

Johan 19:30 ah. Jesu’n dawn ding a dawn a tuachin, “Zo ahita” a chi a, tuachin A lu kunsuh a, A Hagau A hata hi.. Tamkhu in hagaulam ah bang kawh a nei ei? Jesu khu tahsa ahing kumsuh a, leitung ah A hingpei a, khantanhoi ahing gen a, hatlou/chaute leh natnate ahing sudam hi, tualeh shiding a laitan a umte a dinga Khross pua in hundamna lampi a siem hi.

Mangpa Jesu Ama-le-Ama kipekhia in Khross khawvwl khelnate puoin A subuching hi. Tualeh, dawimangpa tung a guolzou in dawimangpa nnasep zousie a suse sieng hi. Tuakhu, Ama’n mihingte hundamna dinga Pasian siltup a subuching hi. Tuajiehin Jesu’n, Khross tung ah mikhielte a ding hundamna nnasep zouin “Zo ahita” a chi hi.

7). Pa, Na Khut ah Ka Hagau Ka Kemsah hi.

Khross tung a, Jesu kamteng nuakhiapen khu “Pa, Na khut ah Ka hagau kahing kemsah,” a chi hi (Luk 23:46). Bang ding a Jesun a hinna Pasian khut ah kepsah sah e? Ajiehkhu Pasian khu Siemtu, Lei leh Van a bangkim tung a vaihawm leh na hinna, shina, hamsatna leh guolzawlana enkoltu ahiziehin ahi. Tamkhu in a gen khu, bangkim Pasian a leh A vaihawmna nuoi a um ahi. Tuaban ah Ama’n miten aw ngaitah a kikou a zah ding uh deidan/zawng ahi chi a theisah nuom hi. Tuaban ah Aman Pasian deina bangin sil zousie a subuchingta chisuhlatna zong a hi. Tuakhu, Ama’n Pasian thumanna bukim toh A nnasep ding a zo nua in Pasian kungah A hagau A kemsah theita china ahi.

Upa (Dikon) Stephen zong Pasian deina bangin a hing a tualeh ginna khu a kem zing hi. Tuaziehin “Mangpa Jesu, ka hagau ana sang in”chiin a hu tawpna a laah toh kiton in a thum thei hi (Nasepte 7:59). Eite jong Pa Pasan deina bang a ihin ua shitan a gin umtah a nna isepchieng un ishini chieng un hangsantah “Zo ahita” tualeh “Pa, Na khut ah ka hagau

ka hing kemsah” ichithei ding uhi.

Jesu Shi Nua in Bang a chi eile?

Khross a Jesu khu aw ngaitah kikou a, A kamteng nukhiapen A nuasiet zou in A shita hi. Tuachin, biehinn a puonzaah khu a tunglam apat in a nuailam tan in phalni a kesuh in ni a kisuo hi. Tamin haguulam a etsah poimotah a nei hi. Biehinn a puonzah sautah khu Mun Siengthou leh Siengthoupente khenna ding ahi. Siempu chilou Mun Siengthoupen ah koima a lut thei sih hi. Tualeh mun siengthou pen a kum khat in siempu lal khat vei maimai a lut thei hi. Biehinn a puonzah hing keh in Jesu khu Ama-le-Ama lemna kithoina suolna bang suchim dinga kithoi ahi chi jong a kawh hi.

Jesu shina tungtawn a khelna baang a chiptah jiehin Pasian toh kizopna tangtahn na nei thei hi. Tuakhu, Jesu Khrist a gingtaatna nei zousie mun siengthou ah a lut thei ding ua tualeh siempu lalte ahisihleh

zawlneite palai ngai nawn lou in Pasian bieh in a thum theita uh china ahi.

Tuaziehin, Hebraite geltu in hichiin a chi hi, “Tuajiehin unaute aw, Jesu sisan jieha mun Siengthoupena lut ngamna hangsan nei in,eite dinga ahing bawlpieh lampi tha leh hing ah puonzah (tua khu ama tahsa pumpi china ahi)- kaantan in (Hebrute 10:19-20).

Banah, leitung khu a kithing a suongte a pawhkeeh hi. Tamtobang siltung ngailou tung in khovel a sil um zousie a liingsah chi ahing hil hi. Hansuongte a kihong a tualeh misiengthou ana sisa tampite pumpi khu hing a kaithou kia ahi. Tamkhu Jesu Khrist gingta pouma ngaidam leh hing kia ahi uh chi chetna thokiana ahi.

(Note: Tam a tung a thute khu Rev. Dr. Jack Roeck Lee laibu apat leh keima sermonte apat kilasawn ahi).

Zin boldan siem un

(Rom 12:13)

**By:- Upa Thangzasuan
Vaal Veng**

Misiengthoute tahshapna onghu dingin na nei nalam te-uh kitanpi unlen, zinbawldan siem un ahing chi hi.

Thumapui: Pasian thu ichipen ishi nua chieng a ding vive ahi sih a, idamsung tomnou kal a ihinpi ding, idampi ding leh izui ngeingei dinga kigiel atam zaw ahi, tuapen ahiding bang taha izui siem uleh nop isahna ding bang ihausatpi ding bang ipil na ding bang leh idamsotpi ding a thu poimaw tampi um ahi. Kumtawn hinna thu pen Jesu gingtaten amu ding uh ahimai a, gentam seng zong angaisih hi (Johan 3:36). Hinanlehzong idamsung

tomnou kal a izah ding izui ding atam zaw dungzui in gentam apoimaw mama a, gensiem apoimaw zaw sem hi. Tulai a minuomsa mihausa chia i en-en te uh khu damsung hun zangsiemte leh gensiemte ahi ukhu, ithupi in zinbawldan siem un achi zong khu, idam sungua izui ngeingei ding ua thupoimaw tah ahi khu aw! aziehpén idam sung un zin lou, vahlou in aki um thei mongmong sih hi. Neh leh tah isuina uah, sum leh pai isuina uah Pasian manggam nna isepna uah zinlou thei ihisih uhi. Tuapén min hing na ngaita sih leh bang isuohta diei le?

Kum 100 (zakhat) peisa lai in, Pastor Lienruma Pasian thu gena avah lai in kho khat ten ana ngaita sih uhi. Tun na ding, giehna ding mu la in, aum hi, ma sawnzé mai dingla Ni tumta hase sengseng in anah a bing vot a, tami laa aphuo h loh hi. Sun nitum lou Zion khopi keidin mun a um diai? khum gam ah, Labupi 138. Tuazieh in Sawltah Paul in ki zintuntuoh un zin bawldan siem un ahing chi ahi khu. Lamka buoi lai in eimite khokhat ah kava galtai ua, tunna ding leh giehna ding ka mu zou sih uhi, ahasatdan athei siemna ding un Mangpan ama uh zong Lamka lang angtaisah ta hi. Kang gen ut pen khu zinte hoitah a lamdot ding ahi. Ahithei leh Ah goh ding bang thasiet lou ding ahi. Aziehpén atamzaw ei innkuon neh ahibou hi, hinanleh ama kipah pen ahi khu Biehin kai ni ahi leh kaipi inlen thuzong gensah un en som vei igen sangin manpha zaw mai thei ahi. Aneh suidante uleh asum

suidan te uh dong kuol kimvel in, tua hileh nazah ngailou na thei ngailou thumanpha khat na za ding a, na thei ding a, hing manpha mama mai thei ahi khu aw!

Tualeh zin dousiem maimai dingin um sinlen nangma ngei zong zin zel in, miten bangchin neh asui uai? Sum asui uai? Bangchin a khosa uai? Hagau dinmun bang a bang uai chite leh siemsinna lam ah bangtan atung uai? chite kankuol inlen, ahoi a na theite khu imi, isate hil in, eima theina guoh a kingah lou ding ahi. 1974 kum a Khampat a ka silmu khat kahing gen ding hi. Table tunga Tap aluoh ua, Chair tunga tou in Ann a huon hiu hiau uhi. Bel suong ding leh dom doh dingin, kun angai het sih hi. Tua hun lai in ei lamten tuongsang a ngiem zaw in Tap ikhai suh ua, Bel sung ding leh dom doh dingin kun kun angai ngitngét hi. Angiem seng ziehin Nupiten Mei asem chiengun vei ate law uhi. Khampatte bawldan pen etton tah kasa mama hi.

Khuolzín tam lei, itheina akibelap ngei ding a, inei, ilam zong kibelap zou dingin ka gingta mai hi. Tuaziehin mi tampi tah toh kímél thei a, ki thuzah tuoh khu damsung a dingin sil poimawtah ahi. Aphattuomna ka hing gen ding Kum 50 peisa lai in Burma gama kolte Pastor khat thugen a avah koikoi lai in singtang khuo inn 30 ding vel khat ah avagieh lut kha hi, akhoten Pastorpa hoitahin ana lamdon uhi. Hinanleh azawn ziehun nehtuitah zong ane hsah zou sih uhi. Pastor pan alungsiet mama a silbangkim a dongkuol tahi.

Nagam uah bang ahoi pen ei? Bang atampen ei? achi leh Sing chikhat a ensah ua, tamte atam mama hi achi uhi, apei dingin tamlou khat apuo a, China Company te a ensah a, na dei ding uoi achi zui hi. Deima ung e, tampikhat ana la aw achi ngal uhi, aman sum ka neiloupi achikia leh 3 lakh athon pai uhi. Pastorpa singtang khuo a vahaw pai in, tampi khat ana la un, aman bang kang chi pieh diei? achi leh kanitha uh tengnga ahi. Tengnga law in ka sem sing uhi achi uhi. Pastor pan hilou e Pasian guoljawlna ahia, iphattuompi tuoh theina dingin Sel khat tengnga in kang leipieh ding hi achi leh akhot

kipah sengsengin ahoh zawh ta uhi. Aziehpén níkhat in Selsomni a la zou ua, nitha za tung hi tuabang a kumkhat aseph uleh akhozangpi un ahausá siengta uhi, akichi hi. Tuama bangin eiten zong thu kan ding zinte bawl hoi ding eima zong zinkuol zel ding thuhoi thupha izahte, bawzui pai ding phattuompi ding ahi. Tuabang guoljawlna itan theina dingin zinbawldan siem ding leh eima ngel zong zinkuol zel dingin Sawltah Paul in ang hil hi. Simtu zousie Mangpa'n hing umpita hen. Lungdam ing.

KEI LEH KA INNKUANPITEN VANG

MANGPA NNA AHI KA SEP DING UH

Joshua 24:15

By: Upa T. Lamkthawng

Pasian panpina zieh in kum 2024 pumpi I mang zouta ua,lungdam a um mama mai hi. Tu in a tamzawte in kum 2025 I Mangpan ta ua kum bul ah I ding nalai uhi. Israelten Pasian panpina toh a gam lahte uh leh Joshua lamkai muanhuai a nei dan uh I thei ding uh ka kinem hi. Israel ten a gam lah ding munte uh ang lazouta ua,a tenna ding mun chiet ua ahing tentah un Kanan mi a um nalai sunteng zong a pia ngam koima a um nawnsih uhi. Israelte khu hun bangtan ahiei sung galmuang in a umta uhi.Tuachi hun sung in Joshua khu ahing upata mama a a shina ding zong ahing naita hi. Ama zong kimuong nawnlou in a gam sung a mi liente leh mipite khu Sekem mun ah a hankhawm hi.Mipi hing peikhawnte kung ah Pasian a dia gin-umtah a um ding in nasatah in hasawtna thuhah a gen hi.

THUGENTE: Kei ka upata a,ka shihah nawnsih ding hi. Ka shi ma in na thei gige ding uleh na zui ding ua tam thute na kung uah ka gen nuam hi.

Tami mun hing tun a tunitan a hing kem khu Pasian ahi chi thei in,a tung ah kipah un,tualeh tunung a hoi leh hoilou ding zong Ama toh na kikaal uh a hoi leh hoilou zil in ahi ding ahi.Pasian thupiehte zui unla tam kanan mite toh kilemna bawlsih un, a bieuh uh biehipi sih unla, ji leh ta in zong na kineilou ding uh ahi. Amaute thagam ding khu na mawhpuohna uh ahi. Hingkhawi

na nei uleh tunung chieng in na mit ua niin taang bang leh na sa tung ua ling thaam bang ahing hi ding uhi. A nna nasep ding uh Pasian tunin teel un, KEI LEH KA INNKUANPITEN VANG MANGPA NNA BOU AHI KA SEP DING UH,a chita hi.

Tambang a thu genna Joshua in a neizou in a kikhawm mipiten zong “Kou zong koima Pasian dang ka be mawngmawng sih ding uhi. Tunitan a ka tung ua hoi tawntung Pasian tah ama nna bou ka sem ding uhi”a chi uhi.

Tambang a Joshua in thu genna a neizou in a kikhawm mipiten zong “Kou zong koima pasian dang ka be mawngmawng sih ding uhi. Tunitan a ka tung ua hoi tawntung Pasian tah Ama nna bou ka sem ding uhi”a chi uhi. Hinanleh zong Joshua a tahsang sia, a gingta sih hi.Semsih va uteh!, a chia. Mipiten vang Mangpa nna ma ka sem kinken ding uhi,chin a dawng uhi.

Tuaphet in Joshua in mipite kung ah ahileh na lah ua um nam dang pasiente koimang unla, na lungtang uh Israelte Pasian lam ngasahta un, a chi hi. Tuachin hiiing zing Pasian nna sem ding in thuhun a bawl ua,tua thuhun thei gigena ding in Joshua in

khum mun ah suong a phutta hi.

Thuhun a bawlzou un mipiten ama uh umna mun chiet ah a kikhenzahta uhi. Tuana a kikhop nung uh sawtlou in kum 110 a upa Joshua khu a shita hi.Joshua a shi in ama mun dia a bawl uh Ephraim tang mun khat ah a vui uhi.Tua ni ma in Aigupta a kipan ahing puo uh Joseph guh zong Sekam a Jacob mun leina ah a vui uhi.Tuami ni ma in siampu lien Eliazer zong a shi a, Ephraim tang ah ama mun ah a vui uhi.Tuachin a khanglui lam mi luite a hing shi beita ua, khang ahing kiheng panta hi.

Tu in eite lah ah enlei, I theisa bang un I lamkai lui, upa muan umte, Pastor muon umte, a tamzaw in hanmuol ang liemsanta ua, a khente a kum uh upata in ang pension santa ua, a umsun khenkhatte lah upata ngetngut mai, vaihawmna mun a zong tou sawt pei nawnlou thu leh la zong kum peitalou, bang a tamta hi. Khanglui lam deute bei hieihieita a, thupi lapi sut ding mi kisamta hi.

Tuazieh in tunin teel va ui, “Ke leh ka inn kuonpiten Mang nna bou ahi ka sep ding uh” chia Joshua in a gen bang in eiten zong I Mangpa nna i sep ding uh bou kisam ahita hi.



JESU TUIPI TUNG A KENG A APEINA

(Mak 6:45-52)

By:- Upa Suankhanmang
Tangpijol

Jesu Khrist vang a, gingtute in tam khovel ah gimthuohna tami thuoh a Van khopi lut ding ihi. Mi khenkhatte in Khristian hinkhuo anop a nop ding bang a ngaituona a umthei a, hinanleh Pasian in amite kungah Jesu nuazui a Manggam nasep ah lungkhamna tuihuolpi leh mangbatna tampi te toh Jesu nuazui a Manggam na sep dign ahidan ahing zilsah hi.

Jesun a nuazuite galkhat lam a Bethsaida khuo ah pei ding in kuong ah atungsah hi, tualeh nitah lam ahing hi tah in kuong khu Tuipi lai ah aumta a, tuachin Tuipilai a kuong khu hui in ale lamlam ah asem koikoi ziehin nuazuite khu lungdong leh chimaw ahidan uh Jesun amuta hi, tuachin khovah kuonlam in Jesu Tuipi tung ah akeng a vah in ama uh lam ahing zuon hi. Tamna izil ding leh ithei ding a poimaw khu Jesun nitahlam in nuazuite tuipilai ah chimaw leh lungkham amu a khovah kuon lam in tuipi tung ah ama uh lam manaw in apei hi. Gingtute lungkham mangbat topkhoh ituoh zong i Mangpa theipina toh ituoh uh ahi chi itheizing ding uh ahi.

Nuazuite in tuabang lungkhamna leh chimotah ah aumlai un alungtang uh akhausah ua Jesu silbawltheina Tanghou nga leh nga ni asuhpung dante zong athei pha non sih uhi. Faro masang a sil lamdang tampi akibawl vang a alung khau semsem na in sil lamdang tampi bawl ahitheina ding a alungtang sukhau a um ana hi ahi.

Hinanleh, nuazuiten, tuitung a Jesu ama uh lam a pei amutah un patau in akikou ua, Thadam (shiha) hiva achi ua a unpi un azauta mama uhi. Tuachin Jesun zausih un keima

kahibou hi. Hamuong tah in um un, achi hi (Hamuong) chi umzie khu Hangsan unlen lungmung un china ahi. Jesun keima achi khu Pasian ahina ghenchtna kamteng ahi.

Huipi in nasetah a amut a tuihuol kinong in Kuong khu amut koikoi lai in tam huipi in amut Tuihuol leh Tuipi kinong tung ah Jesu keng in avah koikoi a, kuong lam angzot lai in nuazuite in ama ute susie ding a hingpei bangin angaituo ua hinanleh Jesu Kuongsung alut zou in huipi leh tuipi kinong asipta hi. Tuachin Jesun ama ute a hamuon a, kuongsung a tuong nuazuite in lamdang asa mama uhi. Jesun tambang silbawltheina anei pen lamdang asa mama ua, Pasian ahinatah tah theichienlou in Jesu theidan tangpi tan a athei uh china ahi. Tuaziehin Pasian khu Pasian ahina dihtah Bible in agendan thumte tamte ahi.

1. Omnis = Munchin teng ah
2. Omniscien = Bangkim thei
3. Omnipresen = Munteng ah
4. Omnipotent = Sil bawltheina

Chi thumte

1. Pasian khu bangkim theitu
2. Pasian khu mun chinteng a um
3. Pasian khu bangkim bawltheitu ahi, Amen.

“KHRIST JESU A UM LUNGSIM”

Philippi 2:5

M. Manglianhang Zou (BD)

THUMAPUI: Mi khat pouma kung ah “Lawm nang bang chi bang mi hi in hing ki thei/chiemte leh na ut ei?” chi le chin atamzaw in “mihausa, vaihawmsiem, mipil, lunglian, etton ta pen in hing kithei leh ka ut hi” chi’n ahing dawng ding uhi. Hinanleh “Jesu Khrist lungsim bang puoh in hing ki chiemte leh ka ut hi” chi a tawm ding hi. Khrist Jesu a um lungsim khu bang adiei? Bang chi nei ding e? Nei mei a hun ding maw? chite i lel khawm ding hi.

A. ATHUSIM HING PIENDAN

Sawlta Paul Missionary Khualzin niveina a pieng Philippi Hattuum zong khat ahi. Ama ngei in tam thute Suongkul apat Epaphroditus tungtawn in aha hi. Sum leh pai a zong kithuopi Hattuum ahi na uah, Kipa tah leh Kituoh tah a um ding in thu apieh hi. Tamte aum theina ding in kingaangiemna leh mite ading khual ahidan agen hi (Ph.2:1-4).

Chang 5-11 sung teng khu Bible siemte’n Zaila (Poetry/Hymn) a kigiel achi uhi. Poetry aki gel chieng in thutam tah tomkim in akigiel hi. Tami Bible chang akhun Theology (Pasian thu) thu tah um ahi man in itheisiam zaw sem nading in mikang ham leh Greek ham ze tel ahi ding hi. Nguntah a sim a thei siem ding in Mangpa Hagau Siengthou in pilna hing guan tachen.

1. KHRIST JESU A UM LUNGSIM (c5).

Sawlta Paul in tamnah Jesu chi masalou a Khrist achi masah zaw jieh ahileh Khrist – “Messiah – thaunupa/hundamtu ding a telpa ahidan a tah lat ut jieh a Khrist Jesu achi ahi. Ahin,

Jesu Khrist zong achi jel thou hi (Rom 1:3; Ph. 2:11).

c5. Khrist Jesu a zong um tam lungsim khu noute ah zong um heh: Sawlta Paul in Philippi mi te kung a “Khrist Jesu lungsim puoh un” achi khu “Kingaangiemna” lungsim agenna ahi. Tam khu ngetna ahi sih a, active voice (imperative mood) a kigiel thupieh (command) ahi. Jesu Khrist gingta zousie in Jesu lungsim apuoh tei tei ding uh china ahi.

Ut Chiang a Jesu Khrist lungsim puoh, ut Chiang a pawlou (Feelings) hilou, Greek te, Jew te, Rome te, Upate, Pastor te, Presbyterian te, Baptist te, Mizoram te ngaidan hilou a Khrist ngaidan in peichiet lei lampiel lou ding ihi chi nuam na zong ahi. Khrist Jesu kingaangiem dan ithei siem sem na ding in Chang 6-7 tan theisiem a ngai a; tualeh akingai ngiem jieh in Pasian in bang abawl pieh ei chi zong igen tel ding hi.

2. KINGAANGIEM DING DAN ZILNA (c6-8).

Christian hinanleizong iki han thawn nate uleh, iki thuhil nate uh Christian

vai lou (UnBiblical) tampi umte lah a khat ahileh kingaangiem ding dan iki thuhilna uh ahi. Kingaangiem ding dan iki thuhul chieng un Screen actor te, Kolte, Meitei te, pangal te kiza tat dan te tungtawn in iki hanthawn uhi. Sawlta Paul in Khrist a um lungsim puoh un achi chieng in, midang te, Greek te, Jew te apat zil un a chi sih a, Jesu Khrist apat zil unlen Ama bang in kingaangiem un achi nuam zaw hi.

Khrist Jesu kingaangiem dan itheisiem sem nading in Greek kammal ni thei poimaw hi. Tamte ahileh Morphe leh Schema te ahi.

c6a. Ama Pasion bang a um hinapi, Pasion toh kibanga um khu sil khiehla huoi in angaituo sih: “Pasion bang a um - in the form of God”, “form” akhun “Morphe” akizang hi. Morphe ichi chieng in hina (nature) kiheng lamdang theilou genna ahi. Sawlta Paul in Pasion bang achi chieng in Khrist Jesu khu Pasion tah tah hilou achina ahisih hi. Pasion tah tah (truly God), Pasion toh a hina (nature) kibang, Immanuel (Matt. 1:23) mihing tahsa la a hing pieng achi na ahi.

c6b. Sil khieh la huai in angai tuoh sih: Mikhat in Sil khat khietla huoilou asah theileh tuami va chiem kha china ahi. Khrist Jesu in Trinity sung ah Pa Pasion leh Hagau Siengthou toh nuam tah in hun (fellowship) azang khawm uhi. Tuami ahilai in Pasion in mihingte a iit seng man in Atapa tang khat neisun ahing pieh a (Jn. 3:16) anop sah na khieh la huai salou

in mihingte a iit seng man in Pasion hina jen pi Mihing in ahing pieng hi. Atom a gen in, “Mihing ahing suoh na khu Substraction (paikhietnalam) hizaw lou in Addition (kibelapnalam) ahi” - (RC SPROUL).

c7a. Hinanleh Ama hing kikoi ngiem in, suoh bangin ahing um a: Tam chang sung a thuteng poimaw dieh khat ahi leh “Kikoi ngiem” chikhu ahi. A Greek kammal in “Kenosis” ahi a, “mani ki awngsahna” china ahi. Tui nou sung a um zousie ta khat zong um nonlou a sungkhiet/awngsah, china toh kibang nanleh tami ki awngsah na khu koi madang in a awngsah hizaw lou in Khrist Jesu ama leh ama; mani a hing ki awngsah na ahi (He emptied himself). Tam ki awngsahna khu Pasion leh mite nnasep pieh ding a suoh bang a ahing umna (Mk.10:45) leh, mihing bang a ahing piengna (incarnation Jn. 1:1) ah akilang hi.

c7b. “mihing bang in ahing pieng hi” Mihing bang achina mun ah, “Morphe” chi kammal zah ahi kieh a, Sawlta Paul in Mihing bang achi chieng in mihing hi nonlou achi na hizawlou in; Khrist Jesu khu mihing tahtah (truly man) ahi achi na ahi. Jesu mihing hina toh ei te mihing hina kibang ahilai in khelna neilou ahi (2 Kor. 5:21).

Tuhun a Bible siem te’n Pasion thu ithei jieh uh ahing en tha ua, heng dinga poimaw asah te uh lah a khat ahileh; Jesu Khrist khu 100 lah a 100 Pasion, 100 lah a 100 mihing chi khu ahi.

Jesu Khrist 100 lah a 100 Pasian ichi chieng in a miHING hina ding mun um nonlou abang a, 100 lah a 100 miHING ichi chieng in a Pasian hina ding mun awng lou abang hi. Tuaban ah, Pasian hina jen pi Ahing pei hun ding atheilou nate leh (Mat. 24:36), miHING ahina ah Khelna nei ding ahi (Gnostic, DanBrown) chi lunggel nate um thei ahi man in, 100 lah a 100 Pasian, 100 lah a 100 miHING chisang in Jesu Khrist khu Pasian tahtah (truly God) (Kumtawn Mangpa- Is. 40:28) ahia MiHING tahtah (truly man) zong ahi chi'n ngaituoh thei talei adih zaw ding achi uhi.

Tambang a ingaituoh theilou leh Pasian thu poimaw tah theikhiel ding ihi na ah sil zau huai tah khat ahi. 4th Century lai in Arius kichi pa'n Jesu Khrist khu Pasian tah tah hilou in Pasian siem masa pen ana chi nanleh, Bible siem phabep khat: Tertullian lamkai na toh Johan 1:1 nate leh Bible sung ah sui chien in Jesu Khrist Pasian tah tah ahi dan leh MiHING tah tah ahi chi khu pom in thu tanna abawl uhi. Tam khu tutan in ei Presbyteian te'n zong ipom dan uh ahi. Ahin Jehova Witness te'n tutan in Arius pom dan agingta nalai uhi.

c8a. Tualeh miHING lim leh mel bang hing puoh in, ahing kingaingingiem a: "MiHING lim leh mel bang" achi na ah "Schema" chi kammal ahing zang tahi. Morphe zanglou a Schema azah na jieh tah ahileh, Khrist Jesu khu miHING (human nature) ahi a, nausen ahi apat hing khanglian in, atahsa te kihenglam dang ban ah gilkiel leh

dangta thei, na sathei, da a kap thei, kipah thei achi nuam na ahi. (Mat. 4:2; Jn. 19:28; Jn. 11:35; Lk. 10:11; Heb. 4:14-16).

c8b. Shi tan dawng in thu amang a, Kross ah shina nangawn ahing thuoh hi: Jew te'n Thumangna tah tah khu miHING khat in aginna tuchin ten a ashi pi chieng in Thumangna tah tah in asim vateh uhi. Tualeh Rom te'n Kross a akhailiah te uh ahileh migilou te ban ah suoh te zong ahi uhi. Chang 7a na a Khrist Jesu Suoh akichi na in miHING te tang a hing shi pa ahina a ensah hi. Kross a shina tan ahing thuoh na ah Kiniemkhiet tah a Pasian (Pa) thu amang dan ata lang hi.

3. KINGAINGIEM TE TAWISANG A UM DING DAN. (c9-11)

c9a. Tuazieh in Pasian in zong Ama nasatahin atawi sangta a: Khrist Jesu in a nnasep ding hing zou in, kingaingingiem tah a thu amang jieh in nasa tah in Pasian in atawisang a, Pasian zietlam ah atou ta hi (Eph. 1:20). Tualeh, lei kisiem masang a thupina anei khu Sillamdang abawl te, mishi akaih thoute, damlou adamsah nate ah hizaw lou in Kross a ashi na ah suh lat ahi tahi (Johan 17:5).

c9b. Min zousie lah a min tungnung pen apeta hi: Rom te ading a minthupi pen tangte ahileh Rom Kumpi te ahia, "mangpa" chin aki han jel uhi. Rom kumpi te bang loutah a suoh bang mei Khrist Jesu aki ngaingingiem jieh in minzousie te lah a min tungnungpen "Mangpa" min Pasian in ape tahi.

Khovel a Khrist Jesu bang a kingaangiem um nonlou ahiman in ama khu khat vei chieng in minzousie vantung a sil umte, leitunga sil umte leh lei nuoia sil um chintengte akhupdin ding a, Lei chintengin, Jesu Khrist khu Pa Pasian thupina dingin Mangpa ahi chi aphuong ding uhi (c10-11).

Hattuum masa te apat tutan in zong Jesu Khrist khu Mangpa chieh hat in aumta hi. Tualah hun tawpni chieng nasan in zong Jew te, Rome te, tuhun a pasien hau mama Hindu te leh apiengtha loute nasan in zong Mangpa Mangpa chi'n ahan ding uhi (Matthew 7:21).

Pasian thumang a kiniemkhiet tah a Athu zui te khu amin uh henglam dang in ana um leng hi. Abram khu Abraham (Siem. 17:5), Jacob khu Israel (Siem. 32:28) tualah Saul khu Paul (Nasep. 13:9) chite in henglam dang in aum hi. Khrist Jesu - Pasien tapa tang neisun mihing khelna jieh a hing shi chi khu kiniem khiet tah a ikhelna te kisia a gingtat na inei chieng in piangthana aki nei ding a, sil siemtha ihi ding a, Khrist lungsim bang puoh thei ahi ban ah ama bang in ikiniemkhiet thei ding hi (2 Kor. 5:17).

Imin hing kiphua sahpen tutan in henglam dang hisihleh zong mite'n ipiangtha masang banglou tah a Kihenglam dangna, Jesu Khrist bang a Kingaangiem na hinkhua tha zang

chieh ahing thei ngai uh ahi.

ETSAHNA: Apiangtha lou khat khu Singkung sang mama, anate hoi mama nanleh ga neilou khat toh kibang ahi lai in a piangtha te khu Singkung sang sih nanleh, aba te lei tuol a kai, ga tamtah suong toh kibang ahi. Piangtha na ding, Ga suong ahithe i nading leh tawi sang a ium thei na ding in Khrist Jesu lungsim puoh angai hi.

THUSINKHUPNA: Bang e Khrist Jesu lungsim? Kingaangiemna lungsim ahi. Bang chibang kingaangiem na ahiei? Pasien thumang a, Ama nnasem kom a ginumtah a shitan pha a mite panpi khu ahi. Kituohnate, kilemnate leh khangtouna aum theina ding in mi koipou in mani metna ding, khat leh khat sietna ding sui lou ding ahi. Midang a ding khuol a, ihin san zong Kingaangiemtah a Pasien leh mite nnasep na a Christian hinkhuo mang ding ahi dan zil khiet thei in aum hi. Khosung, Hattuum sung leh mimal hinkhuo ah zong Khrist Jesu nuazui, Pasien Hagau Siengthou isung a um ahileh, inei sa uh Khrist toh iki tang uh Kingaangiemna khu semkhie/gasuoh sah a, anua izui pa uh umdan a um ding khu Jesu Nuazui dihtahte maw puoh na ahi. Tua hileh tam Khovel khel lam ah zong khat vei chieng in Vanmun ah tawisang ihi ding hi (Mat. 23:11-12). A theisiem ding leh azui zou ding in Mangpa'n hing mapui taken. Amen...

Easter Sunday: Message

Rev. Hauzalian Manlun

Thawkiana ni loup i khu Pasian ni mai hilou a kum tungtawna niteng i lop zing thei uh zawna ni loup ahi. Tami thawkiana theitena ah hundamna ching ginna mite'n nga leng uhi.

(Romte 10:9) A thoukia Mangpa leh hundampa agingtate lung sung a tengden i neiman un Pasian Phat in um hen. (Ephesate 3:17). A hing zing Mangpa i nei man un gingtuten ha it sem vai,

A maipha sui sem vai, a deilam bawlsem vai. Bangziehin ahei i chileh adeilam i bawl sung sien a umpinan ahing guolzawla, tuachin nichin a suh tha a um Khristian hinkhuo i hing zing thei uhi. (Johan 8:29&Sam 23:3).

I thupi uh toh kisai in point 5 in houlim vai:

(1) Thawkiana gingtaten Jesu bang a thoukia ding kinepna hing (living hope) aneiman un bang teng ah thuahatna leh hamuonna a nei leng uhi. (Rom 15:4). Tami thawkiana theichetna leh kinepna neiten Vangam kai ding pawl a kigelna thupitah nei zing kawm in Pasian a itna zieh un, leitung leh a sung a sil umte a itna uh a ngainep deudeu thei uhi. A lelam ah thawkiana gingtaloute khu khovel mite ahi ua, tami khovel Pasian in amit uh a suhtawt pieh zieh in.

Pasian loupina leh Vangam loupina leh nop ding dan amangmat pha vawtsih uhi. (2Kor. 4:4)

Tambang hagaulama mittaw mite pen Gospel khantanhoi thutah ha gen a kigen pawnthawtah a ngaikhetna leh ngaisutna zal bepin Hagau Siengthouin alungtang ua nasemin, khiel kiphawhna leh khiel kisiana (conviction and conversion) a tun lenga, tuachin amahaw asangten (receptor) Hundampa thoukiapa toh kiguizopna hing (living personal relationship) a nei thei bep uhi. Tami ahi Khrist thawkiana nasepdoh i gen utpen tah khu. Jesu i khelnate uh ziehin matsahin a uma, siem i tanna ding un athoukiata hi. (Rom 4:24).

(2) A nina a i genpipen ding ua i deipentah khu Jesu Khrist thawkiana in Laisiengthou a thu kigiel zousie akip akoi in suhtangtung in a umseh a, tami ahibang taha pomkip theiten leitung a hinkhuo umzie theita va un, tupet a i hinsan leh tunua chieng i tun mun zong theichienta unin, leitung silte in akisu bua ut nawnsih ding uhi. Etsahnan ngaidamna hamsa salou ding uh, aziehpén lungsietna jal liulieu a ngaidam a um ahilam uh a kiphawh tawntung ua, tuabang zel in atung ua tawnkhielte ngaidam din mansan um zing leng uhi. A ziehpén mite tawnkhelna angaidamlou uleh amaute tawnkhelna zong ngaidam lou ding ahi thuoi a. (Matt 6:14-15).

(3) Thawkiana theitela ah shi hamuonna leh shi zaulouna a tut leng hi. I tenna uh leitung pen nitenga shinan mihiemte tunga leengpa bang a avaihawmna gam ahiman in, mihiem zousie shi zauhuoi ah i um ua, nanleh nopla i sa, Laphuohtu'n ana chibang in, shina pen Hinna Mangpa thulou in i tung uah mawh tun samlou ding hi. Tami tahsa shinaten ahing dipdap sah chieng un zong, shina zoupa i Mangpa Jesu zalin leh eima a pienthana hagau (born again spirit) a um man in, bangma malmal in ei zousih van in, tuachin Pasian laitan in shihel talei zong maitai tah a um zing thei nalai a khu! Tua ahiman in thawkiana theisiem pen niteng a Jesu toh kichimat a um leh Ama deilam bang ahiei chi theitup gige banah, eima a hinawntalou, eite hing it a, i luong a hing kipepa ginna a, singlamte a kilbeh gige hinkhuo a hin ahizaw hi. (Gal. 2:20).

(4) Athupi lina i gen ut pen uh thawkiana theisimna vangin, i khosahna uh (conversation) van hina in, leisiet a neh leh taah sui a nasem leh gimgenthei thuoh zing a hing hizieng zonglei, i tahsa uh thulimlou tah khu Ama (Jesu) tahsa thawkia tobang silsah a um ding ihiman un,

lungkelou in kinemtah in um zing thei leng uhi. (Phil. 3:18). Tam toh kisai in etsahna nei thu khat envai: Mak 9:1-5 ah Mel danglamna tang i mu ua, khunah Jesu mel ahing kidanglam a, Ama toh kiton in Peter, Jacob leh Johan amu uhi. Tuanah Mosi in a etsah, mishi thoukia ding hi in, Elijah etsah pen shina chiemlou a, sapum suhdanglam a tuoh dingte hi un in, tami ah Jesu'n aloupina a langсах hi. Shina zoupa, thoukiapa, sil zousie a ut ut a umсах theipi ahina atahlang hi.

(5) A ngana i gen uong ut pen: Thawkia silbawl theina thuguh ahi. (Phil. 3:9-11). Tam toh kituoh in i Mangpa'n a guolzoupa kungah Manna kiphuolgu a neh ding in pevang chi'n Kihilna 2:17 ah a chiem hi. Thawkiana silbawl theina thuguh theisiemten, gilkiel thuoh dan siemva un in, neisih nanleh nempi nei kengkung a umdan zong siem va un, mi zousie kungah Gospel silbawltheina kum dingin mansa'n um zing va uh. (Phil. 4:12; 1Kor. 9:21, 22).

Atawp pen in: Thawkiana khu i danbu uh (Constitution) i thuneina uh muna (Bill of right) leh i zalenna uh (our freedom) hisah vai. (Wellmington Bible study pan a teisawn).

NI POIMAWTE:

Palm Sunday	-	April 13, 2025
Good Feriday	-	April 18, 2025
Easter Sunday	-	April 20, 2025

TUNNU LIMBEL PANPITE

14th March to 4th April, 2025

1. PWF L. Gangpimuol, Anntang 25kg	
2. PWF Zomi Colony, Anntang 88½kg leh asum in	Rs. 430/-
3. PWF LDCC Hiangzou, Anntang 74kg	
4. PWF Immanuel Khopi, Anntang 96kg	
5. PWF Sangaikot, Anntang 51kg	
6. PWF Tuibuong, Anntang 113kg	
7. PWF Bohlui, Anntang 38kg	
8. PWF T. Daijang, Anntang 34½kg	
9. PWF S. Vengnuam, Anntang 56kg	
10. PWF Hiangtam K , Anntang tang	Rs. 1,000/-
11. PWF Vaal Veng, Anntang 67½kg	
12. PWF P. Salem	Rs. 700/-
13. PWF Saiboh	Rs. 1,500/-
14. Sarah Vunghoisiam, Lailam veng	Rs. 500/-
15. Chinglemmawi, Lailam Veng	Rs. 500/-
16. Niengkhanhing, Central Church	Rs. 500/-
17. Nu Chinmuonkim, Central Church	Rs. 2,000/-
18. Chingzanuom, Central Church	Rs. 200/-
19. Nu Nousuanhing, Central Church	Rs. 3,700/-
20. Nu Manneihat, Central Church	Rs. 1,000/-
21. Nu Chingzanuom, Central Church	Rs. 100/-
22. S. Langlianpau, Awanchinkap khuo	Rs. 5,000/-
23. Nh. Lalsiemthar, lailam veng	Rs. 7,000/-
24. Upa Gouzamang, Central Church	Rs. 3,000/-
25. Pa H. Kapneithang, Central Church	Rs. 3,000/-
26. ZPCS Tuining	
a)Nu Hauching	Rs. 250/-
b)Pa S. Thangchinpau	Rs. 450/-
c)Nu H. Chinsianhing	Rs. 150/-
d)Upa Ginsuankhai	Rs. 270/-
e)Nu Mannuamniang	Rs. 50/-
f)Nu Neizem	Rs. 150/-
g)Nu Nianglamkim	Rs. 50/-
h)Pa Lianchinthang	Rs. 50/-
i)Pa Tunzamang	Rs. 120/-
j)Pa Chinkhansuan	Rs. 100/-

27. ZPCS Muollum	
i) Mangdeiching	Rs. 8,000/-
ii) Nienngaikim	Rs. 1,600/-
iii) Hau Diamond	Rs. 600/-
iv) Upa Chingenpau	Rs. 500/-
v) Chiinnuomvung	Rs. 300/-
vi) Niengneilam	Rs. 170/-
vii) Chingngainuom	Rs. 170/-
viii) Vunghaulian	Rs. 150/-
ix) Tutsuonkhup	Rs. 150/-
x) Suonpau	Rs. 150/-
xi) Suonnieng	Rs. 100/-
xii) Vungngailien	Rs. 100/-
xiii) Chiinneihoi	Rs. 90/-
xiv) Nehkhantong	Rs. 70/-
xv) Niengngaiching	Rs. 60/-
xvi) Nienghaunuom	Rs. 50/-
xvii) Rev. Khamminlien	Rs. 50/-
xviii) Upa Hangsuonthang	Rs. 50/-
xix) Nienghoikim	Rs. 40/-
xx) Thangkhanmuon	Rs. 40/-
xxi) Nuomkhanngai	Rs. 40/-
xxii) Chingngaimang	Rs. 40/-
xxiii) Niengsienching	Rs. 30/-
xxiv) Dimhoiching	Rs. 30/-
xxv) Vungsuonching	Rs. 30/-
xxvi) Min Zou	Rs. 30/-
xxvii) Ginmuonkap	Rs. 20/-
xxviii) Niengmuonchiin	Rs. 10/-
xxix) Ngaikhannieng	Rs. 10/-
28. Thonglal, Buongmun Lamkhai	Rs. 100/-
29. Nu Flora Hatnu, UK	Rs.50,000/-

Petu zousie Mangpa 'n hing guolzawl taken.

NOTE: A dihloou kha aum le office a suhdih thei zing ahi.

Sd/- Nh. Christina Chinghatkim
 Secretary for Women's Relation
 ZPWF

ZPYF COLUMN

68th Session Khawmpi a ana ki gen ZPYF Lakutpi 2026 Presbyterian Church of India, Tongdam a zah ding ahia, ZPYF 1st Central Committee in Lakutpi Committee ding ana guot a, amau te ahileh

Lakutpi Committee

Chairman : Pa S. Mangminlun

Secretary : Tv. Lalbiahthang

Member : Pa Kapminlun M&R Secretary,

Tv. H Hauminlian Music Secretary,

Incharge Youth,

ZPYF Leader & Secretary,

Youth Co-Ordinator,

Tv. Pauminlun,

Nh. Niangneivah,

Nh. Esther Neiching.

Lakutpi a ding kisah kholna pat ahi toh kituo in, 23rd March Sunday ni Lakutpi min in Host unit ding te toh kikhop na leh houlimna hun jong ana ki nei zou ta hi.

Lakutpi toh kisai theiding poimaw tamlou te.

1. Lakutpi Campaign April 26, 27, May 3,4,10 a um ding ahia, District chin a Campaign a hing kalsuan ding uh ahi.
2. Lakutpi 2026 chieng a ki demna ding items te
 - a) Solo,
 - b) Band (District Liang a)
 - c) Pupa Laa (Traditional song)
 - d) Pupa Laam (Traditional Dance)
3. Solo Competition a ding Form bawl ahia, Campaign a hawmkhiet ahi ding a, Zou Synod Office a Youth Co-Ordinator kung a zong muthei ding ahi.
4. Solo Competition a pang ding ten form fill up a May hasung ngei a submit ding ahia, tualeh Audition 13&14 June 2025 a um ding ahia, MGP Golden Jubilee Hall zah hiding hi.
5. Lakutpi 2026 kidem na a Prize Sponsor bawl ut te a ding bangchi lai pou a Lakutpi Chairman/Secretary ahiloule Youth Co-ordinator thuzah thei ahi.

Tv. T. Thangmuansang

Youth Co-ordinator ZPYF

PATRON MEMBER-TE

001. Upa Gouzamang	002. Pu Hav. Khamchinkhup	003. Pu Khamzalam	004. Pu Chinzasuan
005. (L) Upa Liansuanpau	006. Pu Khamchinthang	007. Pu S. Dalthang	008. Upa Kapkhanthang
009. (L) Upa Langginmang	010. Upa S. Nangkhanlal	011. Pu S. Lamkhotang	012. Upa Dr. M. Lachinkhai
013. Upa Khamchinjam	014. (L) Upa D.K.Manlun	015. Upa Suankhanmang	016. (L) Upa Khupgou
017. (L) Upa Chinkham	018. Upa Ngulchinkham	019. (L) Rev. V. Vungzalian	020. Rev. Retd. Kamkhosoi
021. Rev. Tualzachin	022. Rev. H. Nengzaton	023. Rev. Awnkhankhup	024. Rev. Dr. Hangpi Manlun Zou
025. (L) Pu Tuanzapau	026. (L) Rev. Ginchinjam	027. (L) Rev. Khamzasuan	028. Upa T. Lamkhothawng
029. Upa Khaichinmang	030. Rev. Stephen Chinzathang	031. Pu Khupkhanmang	032. Pu Khaidohlian
033. (L) Hav. Khamzahang	034. Pi Vungzanuam	035. Pu T. Gouzadou	036. Upa Liensuonkap
037. Pi Zerkhochiin	038. Pi Hatkhanvung	039. (L) Pi Ngaihoiching	040. Pi Mankhannieng
041. Pu Goukhanmang	042. Pi Chingzalam	043. Pu S. Thianzakhai	044. Pi Kamkhanching
045. Pu Haukhanpau	046. Pu Tuallianmang	047. (L) Pu Dongkap	048. (L) Pi Chingkhanmang
049. Pi Donkhonian	050. Upa Henzakhup	051. (L) Pu Saichinpau	052. Pu Goumang
053. (L) Upa Khamkhanhang	054. Shie Laangkhanlal	055. Upa Khamkhanlun	056. Upa L. Tualkhanpau
057. Upa Jamsianmung	058. Upa Ginzadong	059. Upa Kaizathang	060. Pi Goizanuom
061. (L) Pi Thangneivah	062. Pu Khamzathang	063. Pi Donchin	064. Upa Liankhanmang
065. Pu Hauchinlun	066. Pu T. S. Lal	067. Pi Goichiin	068. (L) Pu T. Khupchinthang
069. Upa T. Kaizalam	070. Pu Paul Henkholal	071. (L) Pu Soikham	072. (L) Rev. P.C. Manga
073. Rev. Khamchinkhai	074. Rev. Zamlianpau	075. Rev. Chinzapau	076. (L) Rev. Kamkhozam
077. (L) Upa Chinpu	078. Pu Zamkhanthang	079. Pu Chinglen	080. Miss Chinhaunieng
081. Upa P. K. Sawia	082. Pu Goujakhai	083. Pi Niangkhanmang	084. (L) Evan. G.L. Joshya
085. Pi S. Chingkhanmang	086. (L) Pu Vumchinkhup	087. Upa Khaihenthang	088. Upa T. C. Pau
089. Upa Nengchinkap	090. (L) Upa Jamkhongam	091. Upa HT Manga	092. Nu Vahkholhing
093. Pu Hauliankap	094. Pi Chinnu	095. (L) Upa Ngulzakhai	096. (L) Upa T. Gougin
097. Pu Ginsuanhau	098. (L) Upa Langminthang	099. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thatthang Taithul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. (L) Rev. Mangsuanthang	115. (L) Pu Lamchinhou	116. Upa Pauchinlei
117. Nu Kimneihei	118. Upa Kamgenpau	119. Nu Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. (L) Upa Lunchinthang
129. Pu P. Tongthang Zou	130. Pu H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munlao	134. Pu Sianzakhai	135. Upa Thangginsuan	136. Pu Kapminlun
137. Pi Tingzavah	138. Dr. M. Limlunthang Zou	139. Rev. Hauzalian Manlun	140. Rev. Suanglianpau
141. Rev. Ginlianmang	142. Upa L. Mangminthang Zou	143. Upa Goukhanthang	144. M. Thangsuansang Zou

LIFE MEMBER-TE

001. (L) Upa T. Khupkhenpau	002. (L) Pu M. Ginzahau	003. (L) Pu Selzapau	004. Pu L.C. Pautungnung
005. (L) Pi Khamkhannieng	006. Pi Ngainuam	007. Upa Chinsuanthang	008. Upa Shanti Kumar
009. Pu Kamkhohau	010. (L) Pu Khamkhohau	011. Upa Khamzathang	012. Upa Chinkhanthang
013. (L) Pu Tongzathang	014. Pi Chiinneilam	015. Upa Kulthang	016. H/Sm. Upa Kaichinpau
017. Pi Niangzalam	018. Upa P. Doukholun	019. Pu Kapminlian	020. Upa P. Nehgin

Undelivered

Please return to:

The Editor

KHRIŒTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
